

Teater Muzikal Sudirmania Serlah Bakat



Kuantan, 7 Mei- Buat julung kalinya gandingan Kumpulan Waris Teater dan Kumpulan Senandika Teater dengan Revolution Stage yang merupakan produksi asal Teater Muzikal Sudirmania berjaya mementaskan Teater Muzikal Sudirmania di Dewan Astaka, UMP Gambang yang diadakan dua hari berturut-turut dengan lebih 2000 penonton.

Pementasan teater kali ini dibantu oleh kumpulan budaya di bawah Sekretariat Kebudayaan dan Kesenian UMP iaitu Kencana Pawana dan Shutterbuster. Turut serta memainkan peranan adalah kerjasama Pusat Sukan dan Kebudayaan, Jabatan Hal Ehwal Pelajar dan Alumni, Majlis Perwakilan Pelajar (MPP) serta pihak RTM Pahang dengan susunan muzik oleh Ketua Kombo Music RTM Pahang, Muhammad Azrul Yeop.

Pementasan kali ini menampilkan naskah teater muzikal "Sudirmania" yang memaparkan kisah dalam era 80-an yang mana pada masa itu Sudirman merupakan bintang yang sangat berpengaruh.



Skrip hasil penulisan Khairunazwan Rodzy dari Revolution Stage yang menjadi pilihan kumpulan teater UMP untuk dipentaskan.

"Sedikit ubahsuai dari skrip yang asal khas untuk kumpulan teater UMP supaya ianya mengikut dan menghormati sensitiviti warga universiti. Skrip ditulis berpandukan lagu-lagu Sudirman agar perjalanan cerita dan lagu seiringan," kata Khairunazwan.



Pihaknya pernah terlibat dengan pelbagai teater bersama pihak Universiti Kebangsaan Malaysia (UKM) bertajuk Superhero (2015) dan Universiti Teknologi MARA (UiTM), Tepuk Amai-amai dan Senapas (2012).

Bagi pendukung watak utama sebagai Ramlan, pelajar Fakulti Kejuruteraan Mekanikal (FKM), Fakri Shafiq Shahril, 23, dan Intan Nor Farhanah Mohd Said, Fakulti Kejuruteraan Elektrik dan Elektronik (FKEE),²¹ sebagai Zety berkata kepuasan sebagai peminat teater dapat dirasai untuk pementasan kali ini apabila membawa cerita yang amat bermakna terutamanya apabila berkaitan dengan lagu-lagu seniman terulung negara.

Fakri dan Intan antara pelajar UMP yang bergiat aktif dengan seni teater dan mereka telah memberi sepenuhnya komitmen untuk pementasan kali ini kerana ianya menggabungkan dua kumpulan teater dari kampus Gambang dan Pekan.



Teater Sudirmania juga hasil pengarahannya tiga orang pelajar UMP iaitu Afendi Shah Zabri dari Fakulti Teknologi Kejuruteraan (FTEK) yang berumur 24 tahun dan Muhammad Rusydeein Rosmadi, 25 dari fakulti yang sama manakala seorang lagi, Nor Shafeeqa Farhaana Roheezat dari FKEE berumur 23 tahun.

Nor Shafeeqa, pengalaman di dalam penglibatan teater yang sebelumnya menjadi panduan mereka bertiga berganding bahu untuk penghasilan Sudirmania.

Sementara itu, Nurnajat Nadira Abdul Rahman, 23 menjadi tulang belakang apabila berjaya menguruskan produksi Sudirmania dengan jayanya. Kata beliau yang kini menuntut di tahun 3 dalam Ijazah Sarjana Muda Kejuruteraan Awam, menjadi suatu kepuasan apabila produksi dengan penglibatan seramai 60 orang pelajar UMP berjaya walau dengan pelbagai cabaran sebelum dan sepanjang dipentaskan.



Lebih bermakna, teater turut ditonton Naib Canselor UMP, Profesor Dato' Dr. Daing Nasir Ibrahim, Timbalan Naib Canselor (Hal Ehwal Pelajar dan Alumni), Profesor Dato' Dr.Yuserrie Zainuddin dan Penolong Naib Canselor (Hal Ehwal Korporat dan Kualiti), Profesor Dato' Dr Ishak Ismail yang turut dihadiri Pendaftar, Encik Abd. Hamid Majid dan Pengarah Pusat Sukan dan Kebudayaan, Encik Abd Rahman Hj Safie.

Disediakan Nor Fadzillah Zulkipli dari Bahagian Komunikasi Korporat.

Posted By : NOR FADZILLAH BINTI ZULKIPLI Date Posted : 09-05-2016, 14:10:51